

文字對白(繁體中文版)

支持綠色殯葬

妹妹：「哥哥，你睇緊咩書呀？」

哥哥：「呢本書叫《綠色身後事》，故事講主角為過身嘅嫻嫻選擇簡約環保嘅殯葬方式，讓嫻嫻可以回歸大自然。」

妹妹：「呢個故事好有意思呀！」

哥哥：「之前爺爺同我講，佢將來過身都想回歸大自然，我上網睇知道食環署有紀念花園同海上撒灰服務，不如我哋一齊去佢哋嘅辦事處了解多啲？」

妹妹：「好呀，一齊去囉！」

食環署職員：「你好！我係食環署嘅職員，請問有咩可以幫到你哋呢？」

哥哥：「你好呀！我地想知道更多關於紀念花園同海上撒灰服務嘅詳情呀！」

食環署職員：「無問題！現時我哋食環署一共設有 13 個紀念花園；除此以外，市民亦可以選擇到 3 個指定香港海域撒放先人骨灰。」

妹妹：「申請手續方面又係點嘅呢？會唔會好複雜㗎？」

食環署職員：「首先，申請人須持有「領取骨灰許可證」，然後將填妥嘅申請表格連同「領取骨灰許可證」正本親身遞交界我地，亦可以預先傳真、郵寄或者喺網上遞交申請都得㗎！」

哥哥：「聽落申請真係好容易㗎！我上網睇撒灰服務係免費嘅？」

食環署職員：「係呀，不過如果想喺紀念花園為先人安裝紀念牌匾，就要另行繳交行政費啦！」

妹妹：「咁有關申請要幾耐先批核到呀？」

食環署職員：「一般嚟講，紀念花園撒灰申請會於 10 個工作天內批核，而海上撒灰就需要大概 5 個工作天。係呢，講咗咁耐，不如我帶你哋去紀念花園現場睇下？」

哥哥+妹妹：「好呀！」

食環署職員：「咁我哋而家出發啦！」

妹妹：「呢度就係屯門曾咀紀念花園？環境好清幽呢！」

哥哥：「係呢家屬嚟紀念花園之前，有啲咩係要帶嚟㗎？」

食環署職員：「家屬要記得帶同先人嘅骨灰前往紀念花園，然後職員就會帶領家屬步行到撒灰嘅地方。」

妹妹：「紀念花園咁大，撒喺邊度都得啦！」

食環署職員：「唔可以㗎，你睇供撒灰嘅地方會有專用圍欄保護。進行撒灰儀式嘅時候，家屬要將先人嘅骨灰放入撒灰器，再自行選擇撒喺撒灰小路兩旁嘅卵石上或者喺草坪上面。又或者係委託我哋食環署嘅人員代勞都可以！」

食環署職員：「最後家屬喺預先獲食環署編配嘅紀念牌匾位置，為先人安裝紀念牌匾。」

哥哥：「成個過程簡單又不失隆重，我對於綠色殯葬嘅了解又多咗啦！」

妹妹：「咁喺海上撒灰嘅程序係咪都係一樣？」

食環署職員：「唔使心急，等我帶你哋先上船，再慢慢同你哋解釋啦！」

食環署職員：「呢度係北角(東)渡輪碼頭，亦係食環署提供嘅免費渡輪服務嘅「集合處」。所有家屬喺登船之前都要先喺呢度登記資料，如果家屬有需要都可以自行安排船隻㗎。」

哥哥：「咁喺北角(東)渡輪碼頭呢度，係咪每日都有渡輪出發㗎？」

食環署職員：「除咗公眾假期之外，每逢星期六都會安排渡輪接送家屬去到香港海域內指定嘅撒灰地點。」

食環署職員：「時間差唔多啦，我地一齊上船啦！」

食環署職員：「先介紹一位船上嘅工作人員畀大家認識，佢係一位專業嘅禮儀師。」

禮儀師：「大家好！家屬同親友剛剛上船，我會首先為大家講解安全事項，例如係救生設備、船上其他設施等等，確保所有程序都喺安全嘅情況下進行。」

哥哥：「係呢，家屬可以帶同幾多位親友上船㗎？」

禮儀師：「每位申請家屬最多可以攜同 10 名親友出席儀式。我會先安排各個家屬進入指定房間，再協助佢地將先人嘅骨灰轉移到水溶性塑膠袋裡面。」

妹妹：「水溶性塑膠袋？同一般塑膠袋有咩分別㗎？」

禮儀師：「呢種塑膠袋可以喺短時間內喺水中降解，從而令先人骨灰更容易同大自然融合為一！」

食環署職員：（望一望出面）「睇嚟我哋差唔多到達指定撒灰海域啦……」

禮儀師：「好啦，我會按次序通知家屬去下層船艙進行海上撒灰程序，開始之前我哋會默哀，以示對先人嘅尊重，請大家繼續保持安靜。」

[背景稍靜幾秒]

禮儀師：「默哀儀式已完成，而家請各家庭依照職員指示，到下層船艙準備進行海上撒灰程序及悼念儀式。」

哥哥：（細聲地）「悼念儀式係會點樣進行㗎？」

食環署職員：「家屬可以按照先人意願、宗教信仰，選用船上嘅設施，無論係中西式，祈禱或者上香都可以㗎，為先人獻上佢哋嘅最後敬意。」

妹妹：「下層船艙呢度有個「滑梯」係咩嚟㗎？」

食環署職員：「呢個唔係滑梯嚟㗎，佢係一個特製嘅撒灰槽，會直接伸延到接近水面嘅位置。家屬代表就可以將載有先人骨灰嘅水溶性塑膠袋放到槽中，先人骨灰就會沿撒灰槽進入大海，回歸自然。如果家屬有需要，更可以拍攝整個撒灰過程作為紀念。」

禮儀師：「各位家屬親友，跟住落嚟，你哋可以將自備嘅鮮花花瓣撒向海面，有需要嘅話我哋船上亦都有鮮花花瓣提供。」

妹妹：「嘩！啲花瓣好靚呀！」

哥哥：「唔單止靚，呢個程序其實好有意義，可以透過花香陪伴先人骨灰回歸自然。」

食環署職員：「好啦，成個海上撒灰程序就完成啦，最後我哋會協助家屬登記無盡思念網站以及派發紀念咭。希望可以推廣更多綠色殯葬嘅訊息畀大家！」

妹妹：「無盡思念網站？係咩嚟㗎？」

食環署職員：「「無盡思念網站」係家屬可以為離世者開設嘅紀念網頁，可以上載文字、照片、錄像等等。公開之後其他人就可以搜尋同瀏覽紀念網頁，仲可以留言添！」

哥哥：「真係好有心思呀，咁樣家屬就可以永遠保留對先人嘅美好回憶。咁喺手機上面係咪都用得㗎？」

食環署職員：「係呀「無盡思念網站」而家仲推出咗流動應用程式，隨時隨地都用得好方便㗎！」

哥哥：「講起綠色殯葬，早幾日爺爺同講我，佢以後想揀綠色殯葬，要做咩手續㗎？」

食環署職員：「好簡單，只要上「綠色殯葬中央登記名冊」嘅網站登記就得㗎啦！當登記人離世而家屬申請火化服務嘅時候，我哋食環署就可以根據登記人嘅意願而進行跟進。」

妹妹：「多謝你，我哋今日真係學咗好多嘢呀！」

哥哥：「我哋返到去一定會同屋企人分享我哋今日嘅所見所聞同經歷㗎！bye bye！」

食環署職員：「再見！」

哥哥+妹妹：（對鏡頭）「大家都一齊支持綠色殯葬啦！」